

2025-ci yılın Baba Marta ayın 25-dä Kişinev aeroportunda Moldovanın antikorruptiya Merkezi (CNA) tarafından tutuklanan Gagauziya Başkankasına Evgeniya GUȚULa 05.08.2025 günü Kişinev Boyukan sudunda ceza kararı alınacak.

Yarım karar: dili üüretmää izin verdilär, ama...

Baba marta ayın 28-dä çıkan "Ana Sözü" gazetasında biz yazdıydık: "Ortaya çıktı, ani Moldova Respublikasının üüredicilik hem araştırma ministerlii kabletmiş şkola öncesi üüredicilik kuruluşlarında (uşak başçalarında) ştatlar listesini, neredä var romın dili üüredicileri, ama GAGAUZ DİLİ ÜÜREDİCİLERİ YOK".

Ozaman bu karar Gagauziyanın bütün cümnesini, tepremäk gibi, sarıslattı, zerä o GAGAUZ DİLİN yok edilmesine yolları açtıydı.

Gagauziya üüredicilik Upravleniyası hem bütün üüredicilik kuruluşları bu Karara karşı savaşmaa başladılar, çünkü o Kararlan bilä Gagauziyanın uşak başçalarında işleyän Gagauz dilindä 70-tän zeedä üüredici iştan atılacak kertiinä geldilär hem uşak başçalarında Gagauz dilin üürenmesi yok olacek durumu gelecekti. *3-cü sayfa*

Gagauziyada "Aylä, sevgi hem baalılık günü" bakıldı



Orak ayın (iyül) 8-dä, Gagauziya kultura Upravleniyasının zaametinnän, Gagauziyada "Aylä, sevdä hem baalılık günü" yortusu bakıldı. Bu Gün ilgili hristian kalendarının Ay Petri hem Aya Fevroniya gününän, ani sayılêrlar sevgi, baalılık hem aylä mutluluu koruyucuları. Yortunun baş sıraları Kazayak küüyün parkında hem o parkın ştenasında geçirildi. *4-cü sayfa*

"Demokratiya hem Milli Birlik Günü"nä saygı



5-ci sayfa

TİKAYA hem YTBYa eni Başkannar atandı

2025-ci yılın Orak ayın (iyül) 14-dän beeri, Türk İşbirlii hem Koordinaşıya Agenstvosunun (TİKA) eni dönem Başkanı Sayın Abdullah EREN atandı, angısı o günädän Yurtdışı Türklär hem Soy Topluluklar (YTB) Başkanı olarak çalıştı hem YTB Başkannını Orak ayın (iyül) 14-dä kendi yardımcısına Abdulhadi TURUSa devir etti. *5-ci sayfa*



Paterttä: Türk İşbirlii hem Koordinaşıya Agenstvosunun (TİKA) eski Başkanı Sayın Serkan KAYALAR (solda) hem TİKA eni dönem Başkanı Sayın Abdullah EREN devir yapma sırasında.



Paterttä: YTB eski Başkanı Sayın Abdullah EREN hem YTB eni Başkanı Abdulhadi TURUS.

Gagauz dilini Türkiye türkçesi dili mi sayêrlar?

2025-ci Orak ayın (iyül) 1-dä Moldovanın “Teleradio-Moldova” cümne kompaniyası açtı Gagauziyanın başkasabasında Komratta kendisinin “Radio Moldova Komrat” (gagauzça lüzüm olsun – “Komrat Moldova Radiosu”) regional stanşiyasını.



“Radio Moldova Komrat” stanşiyasının açılmasınan ilgili olarak, Moldovanın “Teleradio-Moldova” cümne kompaniyası bildirdi, ani bu radioda 12 saat kendilerinin yarattı gagauzça hem rusça 24 programası olaceymış. Onnarın arasında habêrlâr, kultura, üüredicilik hem şennemäk prıgramaları. Kalan vakıdı da “Radio Moldova” programalarına retranslâtiya yapılaceymış.

“Radio Moldova Komrat” stanşiyasının Gagauziyanın başkasabasında Komratta açılması – islâa hem sevindirici bir haber. Ama, biraz fasıl geler, ani bu radionun plakatında, gagauzçadan kaarâ, angı dildä istârsân yazılar var. Gagauzçanın erinâ dä Tür-

kiye türkçesindä yazı yazmışlar. Plakatta, gagauzça “Selâm” lafın erinâ Türkiye türkçesinin arab dilindän alınma “Merhaba” lafı yazılı. Bu stanşiyayı açannar gagauz dilini Türkiye türkçesi dili mi sayêrlar? Bölâseydi – büyük yannışlıkları var, çünkü Gagauz Dili türk dillerinin ayırı hem KENDİ BAŞINA bir dilidir.

Şindilik “Radio Moldova Komrat” stanşiyasını var nicä seslemää Gagauziyanın Komrat dolaylarında 104,3 FM dalgasında, Valkaneş dolayında da – 105,6 FM dalgasında.

Akademik Todur ZANET,
6 tomnuk “Büük Gagauzça-Rusça Sözlük” yaratmanın avtoru

Milli simfoniya orkestrasının “80 takta Dünneyi dolaylama” konçerti

Orak ayın (iyül) 11-dä, Gagauziyanın başkasabasında “Radio Moldova Komrat” (gagauzça lüzüm olsun – “Komrat Moldova Radiosu”) regional stanşiyasının açılmasınan ilgili olarak, Moldova “Teleradio-Moldova” cümne kompaniyasının Milli simfoniya orkestrası Komradın Kultura Evindä bir simfoniya konçerti gösterdi.



Komratta “Radio Moldova Komrat” (gagauzça lüzüm olsun – “Komrat Moldova Radiosu”) regional stanşiyasının açılmasınan ilgili olarak Moldova “Teleradio-Moldova” cümne kompaniyasının Milli simfoniya orkestrasının bu konçertın adı “80 takta Dünneyi dolaylama” oldu.

Maêstro Andrey ZAPŞA dirijör-luunda simfoniya konçerti programasında orkestra çaldı ölä kompozitorların yaratmalarını, nicä Jorj BİZE (Georges Bizet), İoganes BRAMS (Johannes Brahms), Antonin DVOR-

JAK, Dimitriy ŞESTAKOVIÇ, Aram HAÇATURÂN, Fazıl SAY, Georgi MUSTEA. Bundan kaarâ şindiki kompozitorlar da unutulmadı.

Yazık, ani bölâ bir gözâl konçert may bom-boş salonda oldu, çünkü ona gelân pek az siiređici vardı.

Moldova “Teleradio-Moldova” cümne kompaniyasının Milli simfoniya orkestrası kuruldu 1989-cu yılda. Onun yaratmak öndercisi – halk artisti Maêstro Georgi MUSTEA.

Patret: “Teleradio-Moldova” facebook sayfasından.

Birinci Moldova-EB (Evropa Birlii) Samiti oldu

2025-ci yılın Orak ayın (iyül) 4-dä Kişinevda Birinci Moldova-EB (Evropa Birlii) Samiti oldu, angısında açıklandı, ani Moldovanın üüselmesi Planı için EB tarafından ayrılan 1,9 miliard Evronun 270 milionu artık verilecek.

Nicä bildirildi Birinci Moldova-EB (Evropa Birlii) Samitinnan ilgili Moldova Pravitelstvusunun basın açıklamasında, Moldova tarafından Samitta pay aldılar Moldova Prezidenti Maya SANDU, Moldova Parlamentın Başı İgor GROŞU, Moldova premyer-ministrusu Dorin REÇAN hem Evropa

Birlii tarafından Evropa Komisiyasının başı Ursula Gertrud von der Leyen hem Evropa Konsiliumun başı Antonio Costa.

Açıklandı, ani Samitta Evropa liderleri bildirdilär Moldova Respublikasının Evropalı geleceeni. Bu uurda ortaya koyuldu hem incelendi mem-



leketimizin birleşmeyä yapılacek sıradaki adımları, üüselmä Planın aslıya çıkarılması, infrastrukturalara, energetikaya, dicitalizaŷiyaya, üüredicilää, soşial korunmasına hem regionunun ilerlemesine investiiyalar.

Evropa Birliinä girmenin önemni olduunu Samitta urguladı Moldova Prezidenti Maya SANDU, angısı açıkladı vatandaşların bu birliktän olan faydalıklarını: yol infrastrukturasının hem Romniyaylan elektrika baalarının eni

yapılması, vizasız gezilerini, rouming tariflerin inmesini. Yılın bitkisindä bu tariflerin ortadan kaldırılması.

Birinci Moldova-EB (Evropa Birlii) Samitında memleketin öndercileri hem Evropa liderleri kabletilär Ortak deklaratiyayı, angısında adêrlar Moldova Respublikasının evropalı integratiyasını hızlandırmää hem vatandaşların ömürünü iileştirmää deyni, proektları aslıya çıkarmää.

Kaynak: <https://gov.md/ro>



Yarım karar: dili üüretmää izin verdilär, ama...

Çeketmesi 1-ci sayfada

Bu Karara karşı Gagauziya uşak başçaların 100-dän zeedä direktorları hem Gagauz dilindä üüredicileri imzaladılar hem yolladılar Moldova Prezidenti Maya SANDUYa hem Moldovanın üüredicilik hem araştırma ministrusu Dan PERCIUNA (Dan Perçun) adlarına bir kiyat, neredä teklif ettilär bu şkola öncesi üüredicilik ku-

ruluşlarında (uşak başçalarında) ştatlar listesi enidän gözdän geçirilsin, da orada uşak başçalarında Gagauz dilin üürenmesi korunsun. Bu danışmada sora, Moldova Respublikasının üüredicilik hem araştırma ministerlii aldı karar, ani Kirez ayın (iyün) 27-dän beeri şkola öncesi üüredicilik kuruluşlarında (uşak başçalarında) ştatlar listesinä, ofițial olarak, gagauz dili üüredicile-

rini da koymaa. Bu karar Monitorul Oficial jurnalında artık tiparandı. Ama bunun aması da var.

Nicä bildirer Gagauziya üüredicilik Upravleniyası – bu karar parçalı bir karar, çünkü o Gagauziya avtonomiya-sının şkola öncesi üüredicilik kuruluşlarında (uşak başçalarında) läüzimni sistemanın bütünnüünä uymêêr: stavkalar düşük, paralar da veriler sade

ortanca grupalardan üüretmeyä deyni (ileri ikinci grupalar uurunda başlardı). Belliki, bu ana dilin üürenmä kalitesini mutlaka düşürecek, zera biliner, ani dil üürenmesinä nekadar taa erken dalmak olêr o taa islää sonuçlara getirer.

Büünkü gündä gagauz dilini 56 uşak başçasında 5258 uşak üürener, angılarını 70-tän zeedä gagauz dilindä üüredici üüreder.

“Türkçe kursalar”ı başarannara Katılım Belgeleri verildi

Orak ayın (iyül) 16-da Komrat ATATÜRK türk bibliotekasında “Türkçe kursalar”ı başaran 6-12 yaşları arasında üürencilerä Belgelär verilmesi sırası yapıldı.



Bu sırada Katılım Belgeleri verildi “Türkçe kursalar”ı başaran 6-12 yaşları arasında uşaklara. Belgeleri vermäk sırasında pay aldılar Türkiye Gagauziya Komrat Başkonsulu Adnan HAYAL, bibliotakanın direktoru Vasilisa TANASOGLU, türk dili üüredicileri.



Valentina KOROLÄK “Zaamet şanı” medalisini kabletti

Gagauziya Radio hem Televideniye (GRT) cümne Kompaniyasının baş redaktoruna Valentina KOROLÄKa 2025-ci yılın Orak ayın (iyül) 7-dän Kararınnan Gagauziyanın “Zaamet şanı” medalisi verildi.

Valentina KOROLÄKa “Zaamet şanı” medalinin verilmä sırası yapıldı Orak ayın (iyül) 8-dä Gagauziya Radio hem Televideniye (GRT) cümne Kompaniyasında, nereyi, maasuz bu iş için, geldi Gagauziya İspolkomun Predsedatelin birinci yardımcısı İlya UZUN.

Gagauziya Radio hem Televideniye cümne Kompaniyasının baş redaktoruna bu ödül verildi “Canabisinin uzun yıllar candan zaametleri, kendi zanaatına diişmeyän balılı, baamsız jurnalistikanın ilerlemesinä katkıları hem üüsek ustalı için”.

Biz dä, “Ana Sözü” gazetasi olarak, kutlêeriz Valentina KOROLÄKı 55 yıldönümünän hem bu hak et-



tii ödüllän. Saalık hem uzun ömür Canabinizä. Kutluca olsun!

“7-li regbi Evropa Çempionatı”nda Türkiyedän karılar komandası 1-ci oldu

2025-ci yılın Kirez ayın (iyün) 27-29 günnerindä Kişinevün “Dinamo” stadionunda geçti sıradakı “7-li regbi Evropa Çempionatı”n II-ci etapi.

“7-li regbi Evropa Çempionatı”nda pay aldılar 24 devlettän regbi komandaları. Onnarın arasında vardı Türkiyedän karılar hem adamnar komandaları da.

Türkiyenin karılar komandası bu Çempionatta 1-ci oldu, Türkiye adamnar komandası sa 4-cü eri kazandı.



Kıpçaklı Maksim DIMOV serbest güreştä Evropa U-20 Çempionatında bronza medalıyı kazandı

2025-ci yılın Kirez ayı (iyün) 30-zu – Orak ayın (iyül) 6-sı günneri arasında İtaliyanın Caorle kasabasında UWW (United World Wrestling) kanadı altında geçti serbest güreştä Evropa U-20 Çempionatı.

Moldova komandasında serbest güreştä Evropa U-20 Çempionatında pay alan Gagauziyanın Kıpçak küüyündän genç güreşçi Maksim DIMOV çempionatın bronza medalisini kazandı.

65 kg kategoriyasında güreşän 17 yaşındaki Maksim DIMOV bronza medali için güreştä 14:3 ensedi Gruziyadan sportsmeni. Ama bunadan, kendisinin bronza medalisinä yolunda, Maksim DIMOV ilktän 11:0 ensedi çeh güreşçisini. Sora, 1/8 finalda, o 3:2 ensedi poläki. ¼ finalında tarattı ukraynalı sportsmena – 3:6. Sora da ensedi Estoniyadan güreşçiyi.



Läüzim urgulamaa, ani bu büyük başarıya hazırladı bu gagauz sportsmenini trener Pötr VLAH.

Gagauziyada “Aylä, sevgi hem baalılık günü” bakıldı

Orak ayın (iyül) 8-dä, Gagauziya kultura Upravleniyasının zaametinnän, Gagauziyada “Aylä, sevdä hem baalılık günü” yortusu bakıldı. Bu Gün ilgili hristian kalendarının Ay Petri hem Aya Fevroniya gününän, ani sayılêrlar sevgi, baalılık hem aylä mutluluu koruyucuları. Yortunun baş sıraları Kazayak küüyün parkında hem o parkın ştenasında geçirildi.



“Aylä, sevdä hem baalılık günü” yortusu sırasının ofițial açılışında, burayı toplanan insannara, nasaatlarlan danıştılar Gagauziyanın öndercileri, erindeki kuvetlerin temsilcileri, cümne insannar hem popazlar.

Bundan sora başladı büyük bir konfert, angısında pay aldılar Gagauziyanın anılmış artistları hem vokal ansamblleri, Gagauziya kliselerin pazar şkolalarından yaratmak kolektivleri.

Konfert zamanı, ştenada kurulan



arka ekranda, gösterildi birkaç vido-klip, ani hazırlanmıştılar maasuz bu yortu için.

“Aylä, sevdä hem baalılık günü” yortusu sırasında seftä gösterildi hem tanışmak oldu Yuliya ARNAUTun çaldı “Analar” (laflar – Todur ZANET, muzıka – İliya FİLEV) türküsünün videoklipinnan. Genç türkücüka Viktoriya ARNAUTun çaldı “Zamannayêrsın, evi!” (laflar –Todur ZANET) türküsünä dä bir videoklip gösterildi.

Ştenadan ötän başka türkülär dä büyük sevinmeliklän hem meraklıklar karşıldılar. Çünkü hepsi onnar aylä, sevgi hem baalılık içindilər. Yortu da, türkülär dä gösterdilər hem aklımıza getirdilər, ani insanın yaşamasında en paalı hem önemni er – onun aylesi. Zerä aylä – bu bir yuva, neredä biz üü-reneriz sevmää, biri-birimizi annamaa, prost etmää hem biri-birimizä arka olmaa.

Yortu sırasında parkta türlü oyun erleri hem el ustalık sergileri açıldı.



Komratta klisedän Kıpçak yamacına Kruçalı örüyüş geçti

Orak ayın (iyül) 6-da Gagauziyanın başkasabasında Komratta geçti bir Kruçalı örüyüş, angısının uuruydu aylä hem adetlerimiz olan paalılıklarımızın korunması, hristiannık için hem yaamur yaasın deyni dualar.

Kruça örüyüşü için insannar toplandılar Komrat İoan Vatizedici klisesinä. Burada, Göktä Bobaya dualardan sora,

Kruçalı örüyüş yollandı Komrat yakınlarında bulunan Kıpçak yamacına, angısı var hem sayılêr gagauzların ruh



üüselişin hem dayanıklınnı simvolu.

Yolca din türküleri çalarak hem dualar yaparak, Kruçalı örüyüş etişti Kıpçak yamacına da, burada bulunan Dua

kruçasının dolayında, insannar hem popazlar birleşik dua ettilär barış, aylä paalılıkları, hristian adetleri, mutluluk, bereket, selemet hem yaamur için.

“Analar” türküsünün videoklipi dünneyä yayıldı

Gagauziya kultura Upravleniyasının zaametinnän hazırlanan “Analar” türküsünün videoklipi Orak ayın (iyül) 8-dä dünneyä yayıldı.



2023 yılın Kırım ayın (dekabri) 22-dä, Gagauziyanın kultura Upravleniyasının çalışmasının yapılan I-ci “ENİ TÜRKÜ” yarışmasında “Analar” (*laflar Todur ZANET, muzıka – İlya FİLEV*) türküsünün Grand-Pri ödülünü kazandı anılmış türkücüyümüz Yulya ARANAUT. Ondan sora Gagauziyanın kultura Upravleniyasının Başı Marina SEMÖNOVA adadı bu türküyä bir videoklip yaptırmaa. Da te, sindi, “Analar” türküsünün videoklipini başardı hem dünneyä yayıladı – <https://www.youtube.com/watch?v=WDx0EHrx6w4&list=PPSV&t=11s>.

“Analar” türküsü – bu bütün dünneyn analarına başlı hem o analara sevgiylän dolu bir türkü.

Türk İşbirlii hem Koordinaşıya Agenstvosu (TİKA) hem Yurtdışı Türklär hem Soy Topluluklar (YTB) Başkanlıklarına eni Başkannar atandı

2025-ci yılın Orak ayın (iyül) 14-dän beeri, Türk İşbirlii hem Koordinaşıya Agenstvosunun (TİKA) eni dönem Başkanı Sayın Abdullah EREN atandı, angısı o günden Yurtdışı Türklär hem Soy Topluluklar (YTB) Başkanı olarak çalıştı hem YTB Başkanını Orak ayın (iyül) 14-dä kendi yardımcısına Abdulhadi TURUSA devir etti.

Türk İşbirlii hem Koordinaşıya Agenstvosunda Orak ayın (iyül) 14-dä yapılan devir sırasında hem o sıraya katılan TİKA personalın önündä önceki dönem TİKA Başkanı Sayın Serkan KAYALAR erini Canabisinä Başkanını devir etti.

Devir etmə sırasında Sayın Serkan KAYALAR TİKAda onun yanında hepsi çalışannara şükür etti hem eni dönem TİKA Başkanı Abdullah ERENä çalışmalarında içtän başarılar diledi.

Kendi tarafından TİKA Başkanı Sayın Abdullah EREN şükür etti Serkan KAYALARA hem, devrim sırasından sora, TİKA personalın bir toplantı yapıp, eni dönem çalışmalarına ilişki paalılıklarını açıkladı.



“Demokratiya hem Milli Birlik Günü”nä saygı

2025-ci yılın Orak ayın (iyül) 15-dä, ilktän Türkiye Kışinev Büükelçiliindä, sora da Gagauziyanın Çadır kasabasında kurulan 15 Temmuz şehitlerine anmak nişan taşın yanında 2016-cı yılın 15 Temmuz (Orak ayın (iyül) 15-şi) gecesi Türkiyedä FETÖcular devlet devrimi denemesinä karşı koyan kahramannın anması hem 15 Temmuz (Orak ayın (iyül) 15-şi) günün “Demokratiya hem Milli Birlik Günü” bakılmasının 9-ci yıldönümünün bakıldı.

Türkiye Kışinev Büükelçiliindä 15 Temmuz “Demokratiya hem Milli Birlik Günü”nün bakılması sırasına, başta Türkiye Kışinev Büükelçisi Uygur Mustafa SERTEL hem TC Kışinev Büükelçiliin diplomatları, Türk İşbirlii hem Koordinaşıya Agenstvosu (TİKA) Kışinev ofisin koordinatörü hem zaametçileri, akademik hem yazıcı Todur ZANET hem başka insannar katıldılar.

Gagauziyanın Çadır kasabasının “İzmit kardaşlık parkında” kurulan 15 Temmuz şehitlerine anmak nişan taşın yanında yapılan “Demokratiya hem Milli Birlik Günü” sırasına sa katıldılar Türkiye Kışinev Büükelçisi Uygur Mustafa SERTEL hem Türkiye Kışinev Büükelçiliin diplomatları, Türkiye Gagauziya Komrat Başkonsulu Adnan HAYAL hem başkonsulluk personalı,

Türk İşbirlii hem Koordinaşıya Agenstvosu (TİKA) Kışinev ofisin koordinatörü Tarık METE hem TİKA zaametçileri, Gagauziya Halk Topluşun Başı Dimitriy KONSTANTİNOV hem GHT deputatları, Gagauziya İspolkomu predsdatelin yardımcısı Viktor PETROV hem İspolkom azaları, Çadır rayon administratşıya azaları, başka insannar.



Bir kral varmış, Filip, çeketmiş cengä gitmä. Sımarlamış karısına: “Açan geeri gelecäm, seni uşaksız bulmayım. Her uşaksız bulursam, kafanı kesärim”. Bir da genä başka kral vardı başka erdä, başka padişahlan cenk edärdi hem o filosofdu hem büücüydü. Oralarda padişahları hepsini aç öldürecedi, zerem yaamurlar çekärdi. Da onun üstünä hepsi kalktı.

Da ozaman kalktı, döktü bal mumu, baksın, enseycək mi osa enilecek mi. Gördü, ki enilecek. Ondan sora döktü kapu önündä bir tuçtan stılp patredini da girdi içeri, giindi başka rubaya, da dedi onikillerä: “İhtiyar giderim, genç gelecäm”. Da aldı ilaçlarını, gitti Filibin memleketinä hem, gezdi erdä, baardı: “ilaç alın!”

Osa başka erdä gezmedi, salt onun (Filipin) kapusu önündän geçärkan, baardı, zerem bilirdi, ani onun uşaa olma- yor. Da padişahka çardı onu içeri, ilaç versin uşak olmak için. Da o bakmış elinä da demiş padişahkaya: “yapacan sän bir erkek evlat, ama kartaldan needa olacek; avşama yak mumnari da gelecek sana bir kartal, görünecek kafası aslan, kanatları bir altın, biri gümüş da o gelecek büyük gürlütylän, da onun gürlütüsündän mumnar sünecek, ama korkma. O auşam brakasın kapuları açık. Da o adam olacek da onunnan yat da uşaan olacek”. (o sa kendiydi).

O bilgiç adam almış sırtına bir aslan derisi, da gitmiş padişahkanın odalarına. Baksa, kapular açık. Padişahka duruyor çardakta. Girmiş içeri, kapamış kapuları, soyunmuş da yatmış padişahkaylan. Üç gecä sıravardı, üç gündän sıravardı, bakmış kihada bilgiç da demiş padişahkaya: “İçmeyäsin bu günnerdä içki, zerem başlattım çocuu”. Da gidecää zaman dedi: “Açan uşak duacek, beni çır, da bän bakayım planetalara, da isläh planetada duusun”.

Da çarıta yaptı ona ograda içindä bir kuhnä. Vakit geldi duumaa, çardı genä onu, da o dedi: “Duurma şindi, zerä saatlar fena”. Da astı onu ayaklarını yukarda, da açan vakit geldi, kolverdi onu da dedi: “Duusun şindi. Da bu saatta duan dünneyi alacek hem adı Aleksandri Makidon olacek”.

Filip ta orda cenktä düş gördü: göktän düştü bir kartal yımurtası eteenin üstünä da kırıldı da çıktı içindän bir yılan, da dolaştı o kapçı, da delä girämedi, öldü.

Çardı Filip Afanasiyi filosofu, dedi: “Bän bir düş gördüm: göktän bir yımırta düştü eteemin üstünä, da kırıldı. İçindän çıktı bir yılan, da dolaştı kapçı, da aaza geldiyän, girämedi erinä”. Da filosof dedi ona: “Ozaman senin bir erkek evladın olmuş, da o dübüdüz dünneyi zapt edecek, ama tahtına girämeyecek”.

Padişah düdü bir telegrama evä: “Var mı bendä sevinmelik evdä, osa yok mu?” Karı düdü, ani var sevinmelik. Filip ta orda bal yaptı. Tamamadı, cengi bitirdi, geldi evä, gördü, ani var aslı.

Aleksandra açan edi yaşındaykan şkolaya gidärdi, bir da uçtilisi vardı evdä, onu osabit üredirdi. Kursunu bitirdiktän sora, çardı onu ihtiyar, planetaları üretmä, da üretti hepsini.

Ürendi, da dedi çocuk ona: “Sän kendin nezaman ölecän?” O da dedi: “Bän kendi ecelimdän ölemeyecäm, beni oolum öldürecek”. O da dedi: “Nezaman sän evlenecän da seni oolum olacek, da büücek, da seni öldürecek”. Da itirdi onu, düştü kalidordan, da öldü.

Kaçarak gitti anasına, söledi: “Bän

bir hata yaptım”. Anası dedi: “Ne hata?” “İhtiyarı, – dedi. – öldürdüm”. O da dedi: “Bän ona sordum, beni bukadar ürettin, ye sän kendin nedän ölecän, sän lääzım biläsin? O da dedi: zer bilerim, beni oolum öldürecek. Bän da dedim ona: nezaman sän evlenecän da olacek oolum, da büücek, da öldürecek seni, da ittirdim onu, düştü çardaktan da öldü”. Anası dedi: “Günah yaptın, – dedi. – hakına boban odur”. Sora büük sıralarlan gömdü onu. Açan oldu Aliksandri onbeş yaşında, hergeledä bir kısırak kullunadı, yaptı bir kuli bir buynuzlu, üç çetvert buynuzu. Da hergeleci geldi haberä: “Padişahım, – dedi. – hergeledä bir kısırak yaptı bir kulun, ne minunat, bir buynuznan da yok nası yaklaşmaa”. Padişah ta dedi: “Getir evä kısıraa”. Şindi getirdi kısıraa, yaptırdı bir demir ograda, da kapadı orayı kulunu kısıraklan. Orda besledi onu, kulun büüncä. Kabaatlıları orayı atardı, o öldürdü onnari buynuzlan. Kimseyä da tutulmazdı, vardı bir delik da deliktän buynuzunu çıkarırdı. Aliksandra Makidon da onu sevärdi. Şindi o padişaa (Hülüp) yaptı bir bal. O konuşurkan, Aliksandra Makidon koydu kantarmayı başına da pindi ona. Ozamandan kimsey ona yel koymadı.

çingenelär o krallan lafları birdi. Filip dedi ona: “Ne geldin?” O da dedi: “İşittim, ihtiyarlıkta çok hasta yatmışın da geldim dolaşayım seni”.

Büük yıkram yaptı ona Filip da o da Filiba teklif etti: “Buyur sän da bizä, bän da sana yıkram yapayım, bir kerä ölmedän”. Götürükän, daa içinä girdiyän, çıktı kralın askeri, laflıymışlar, tuttular, baaladılar Filibi, da braktılar balı. Aliksandriya da telegrama düdüldür, hani bobası filan kral baaladı deydi. Bobasını baaladılar, anasını da aldılar, zerem anası pek gözäldi hem gençti.

Aliksandra da işittiyän, geldi, taa erinä etişmedän, etişti onnari yolda, on bin askerlän. Aldı anasını hem onun askerini da getirdi evä. Gitti genä tatarlara cenk etmä, bozdu tatarlık, beş altı kral oldu, esir alêr, işitti Dariya. O büük padişahı hepsinin harcını topladı. Filip ta öldü.

Dariya yolladı Aliksandriya bir adam, gelsin, onu şkolaya vereyim, da üredeyim onu, zerem pek genç kaldı. Da o adam dedi ona: “Dariya teklif eder geläsin üretmä hem harcıları getiräsin”. Hem Dariya ona yolladı bir taligacik, oynasın dedi. O da çevirdi da sıbıttı onu. “Bän, – dedi. – bölä gezeçäm onun merası içindä”.

Gagauz mifologiyasından

Aleksandri MAKİDON

Tokattan çıkarkan, gördülär, bir taa görmedilär. Padişah sımarladı adamnana, pinsinnär hem isläh beegirlerä, gitsinnär onu aaramaa. Çekettilär da gittilär izini buldular da bir çukura etiştilär, on stınçin geniştı da onnar çukur içindä aaradılar. O gitmiş, atlamış çukuru.

Atladiyanan çukuru, gitti başka memlekettä buldu birerdä çark, çeviretler, dönerlar iitleri. Aleksandri bir kerä çevirdi, çıktı bir harap, kılıçlan kesti onu. Bir kerä taa çevirdi, genä harap çıktı, onu da kesti. Üçüncü kerä çevirdi, genä harp çıktı, onu da kesti, dedi: “Nereyi gidersin?” “Seni aaramaa”, – dedilär. “Neiçin kuvalayorsunuz beni? Lüzgär tutulmaz”. Geldi evä bobası da aalardı, onikilär da hesaplardılar, bir padişah ayırsınnar, o edämeyecek ihtiyar deydi.

Aleksandra Makidon da baaladı beegirlerni, da girdi içeri da onnar yukarda konuşurdular. Aleksandra da işitti laflarını onnarın, aldı skaunu da urdu birisinä, öldürdü hem baardı aslan gibi. Öbürlär da korktular, da atladılar erä. Da atladiyanan, taa ikisi öldü. Aldılar o leşleri, mezarlaa gömdü, da ertesi günü yolladı haber o kalan onikileri, gelsinnär padişah ayırmaa. Onnar geldilär, ama tez gelmedilär. Geldiyän Aleksandri dedi onnara: “Ne gelmeersiniz padişah ayırmaa, bobamız ihtiarladı”. Onnar da dedi: “Bizim var padişahımız”. O da dedi: “Kim?” Dedilär: “Sän genç padişah olacan”.

Tatarlar da kalktı üstünä Filibin, o da yolladı Aleksandriya cengä. Da gitti Aliksandra, nekadar tatarlık vardı, hepsini bozdu, aldı esir. Bir erdä da neenda azırdılar kırk kişi hen zengin çengenele- ri. Da gelsinnär Filiba da yalvarsınnar, bozmasın onnarın erini deydi, pek fukaarä kaldık. Giidilär yırtık ruba da geldilär Filiba. Filip ta onnara saa olun dedi, koydu onnara masa, doyurdu onnari. Onnar iyirkan, bir da başka kral geldi, ama o

Adam gitti geri. Dariya sordu: “Ne gelmedi?” O da söledi oldu gibi, hani dedi ona ne harç verecäm, ne da onu sesleycäm. Dariyanın da pek üfkesi çıktı, yolladı ona bir başka adam bir çuval haşış te onunnan.

Aliksandri dedi: “Ne geldin?” O da dedi: “Dariya teklif eder hacılar için, her seslemäsan, te bukadar askeri var, seni kaybedecek”. Aleksandra da dedi: “Aç çuvalı, bakayım ne türlü kuvedi var”. Açtı çuvalı, aldı bir auç haşış, attı aazına, idi. “Bän, – dedi. – onu te bölä çiiineycäm”. “Ama, – dedi. – bän da kuvedimi göstereyim, yollayım ona, o da isin benim askerimdän. Baksın iyäbilirsa isin, iyämärsa – bän onu te bölä iyecäm”. Yolladı Aliksandra Dariyaya bir demirli kırmızı biber. O da dedi: “İsin bunnardan bir auç. Bän idim, – dedi. – onun baaşışından da ozaman gelsin bendän harç istemää”.

Ondan sora Aliksandra gitti askerinnän da keybetti Dariyayı. Ordan çeketmiş cenk etmä. (...) Ordan gitmiş Por padişahına. Paysınmışlar cenk etmä. Por padişahı demiş: “Dur, ver bana iki günä mühlet”. O boşlamış. Çeketmişlär genä cengä. Por padişahı kaavi adammış, görmüş, ani enseyämeycek, demiş Aliksandriya: “Aliksandri! Gel ikimiz düüşelim”. Çıkıyorlar ikisi düüşmä. Annamış Aliksandri, ani Por onu enseycək, demiş: “Nasıldı lafımız, asker geri dursun, ya bak onnar geler”. Por bakmış aardına, Aliksandri urmuş kılıçlan, kesmiş kafasını, almış onun padişahlını da gitmiş ileri.

Urmuş bir kumnaa, gecelemiş o kumnakta, da on bin asker taşımış karımcalar deliklerä. Getirmiş saman da yakmış karımcaları. Ordan gider ileri, gecelemiş bir erdä. Orayı da gelmiş bir soy kuş, on bin asker kavramışlar beegirlär üstündän. Kalan askerä baalattı birär demet saz, da genä geldi o kuşlar da o demetleri tutuş- turdular, da yandı kanatları, da öldürdü on bin kuş. Da açan çıktı ordan, gitti

ileri, gördü bir karartı. Etişti orayı, orda vardı bir stılp. O stılpın dolayanı sadä adam kafasıymış hem kemik. Da gitti stılpı, da okudu. O stılpı yazardı: “Burayı gelän, ileri gitmesin, geeri dönsün”. O da aldı da sardı onu muşamaylan, asker görmesin.

Ordan çeketti, gitti bir bayır üstünä. Çıktı, o bayırda vardı yaban adamnari, onun on bin askerini öldürmüşlär, çıkarıp daayı köktän da aaçtan urularmış. Sora o da öldürmüş yaban adamnari. Bakıyor bayırın üstündän, görüner bir denizin ötäända bir kara er, da gitmiş orayı. Baksa, orda var bir kalä. O kaledä varmış oniki kral, kapanmışlar kaleya da gördüyän onu, demişlär: “Ne aarayorsın burda, Aliksandri? Sän burayı geldin, ama geeri gitmeycän”. O da demiş Yontiya padişahına: “Gidecäm”.

Gitti orayı da Yontiya padişahı, dedi: “Yok mu bir kabın, verelim sana su, da yıkan o suylan, altmış yaşında olduy- nan”. Almış su da çeketmiş, gitmiş bir kaleya. O kala cennetmiş. İncelar demiş: “Ne aarayorsun, Aliksandri burada? Burdan buyanı yok näanı gidäsin”. O da dedi: “Bän bilmeirim, näanı gideyim”. İncer gösterdi ona, näanı gitsin.

Döndü geeri, gitti balıkların padişahına da cenk etti balıklarlan. Da tuttu diri balık padişahını, da balıklar hepsi geminin ardına gidärdi, türkü çalarak. Da durdu, da onnara padişah koydu.

Ordan gitti, çıktı denizdän. Denizin kenarında buldu bir mahra. Da girdi beşüz askernän içinä atlı. Da beegirlär hepsi kısırakı, kulileri braadı dışanda. Da açan girdi orayı, buldu orda haznä parası. Hepsı hiibä doldurdu, birär da kizhir taşı buldular, da hepsi aldı birär, da yoldular süngülerä. Da kulilär kişnemää başladılman, kısıraklar çıktılar da çekettilär gitmä.

Üç sutka gittilär da etiştilär Kırtiyan- nara, onnar her gün cenk edärdilär. Onnari da üretti, nası öldürsünnar turnaları. Ordan gitti bir soy adam bir gözlän, bir ayaklan, bir da kollan. Da tutmuş onnarın padişahını, da dedi Aliksandriya onnarın padişahı: “Näpacän bizimmän: bizdä bir ayak, bir göz, bir da kol, ne umut edersin bizdän?” O da kolvermiş onnari. Kolverdiyän, demiş birisi: “Ne ahmak padişaa bu adam, o bilsä bizim barsaklarımızda ne var, o salvermeyecek”. Da vardı onun bir aslanı, da kolverdi onnari, da öldürdü hepsini. Paralattı o aslanlara, çıkardı içlerindän almaz taşlarını. (...)

Ordan gider ileri, etişer bir padişahlaa, da gezärkan orda, görmüş bir mahra, aazından tütün çıkarmış. Demiş Aliksandra: “Bän girecäm, bakayım ne var onun içindä”. Da girdi. Açan girdi orayı, buldu orda kaynatasını, buldu Por padişahını. Gördüyän onu, dedilär: “Sända mı girdin burayı Aliksandri?” O da dedi: “Bän geldim sizi görmää, düşmedim burda sizin gibi zeetlenmä”. Onnar orda baalı durularmış sincirdä, o cendemmiş. Çıkmış ordan, gitmiş kendi erinä. Etiştiyän, kurmuş lagar. Granişayı etiştiyän da yapmış bal. Konuşurkan vermişlär ona otrava. Da yölmüş gelmişkän kendi topraana.

Not. Bu yaratma gagauzçada dünnä mifologiyasından erleşmiş olan bir masal. O alınma Valentin MOŞKOVun 1904-cü yılda tiparlanan “Nareçiya Bessarabskih gagauzov” kiyadından hem, ufak kısaltmalardan sora, tiparlı original stilistika korunmasınnan, ama kimi orfagrafiya doortmaklarinnan).

En islää vıpusniklara hem onnarın üüredicilerine ödüllär

Orak ayın (iyül) 10-da Gagauziya lişeylerini başaran en islää üürencileri hem onnarın üüredicilerini ödülledilär. Bu yıl Gagauziyada 1 üürenci altın hem 16 üürenci gümüş medalileri kazandılar. Bundan kaarä 37 vıpusnik Gagauziya Halk Topluşu hem İspolkomu diplomalarinnan ödüllendi hem 22 üürenciyä dä Gagauziya üüredicilik Upravleniyasının diplomaları verildi. Ayırca, üürencileri ekzamennara islää hazırlayan 45 üürediciyä da Gagauziya Başkanın gramotaları verildi.

Altın medali kazandı üürenciyka Viktoriya UZUN, Ütülü küüyün “Saveliy Ekonomov” lişeyi.

Gümüş medali kazandılar üürencilär hem üürenciykalar:

Elena SLAV, Kongaz küüyün “Süleyman Demirel” lişeyi.

Vladimir BAUTOV, Valkaneş kasabasının “Aksentiy Doljnenko” lişeyi.

Valeriya TOPORAŞ, Valkaneş kasabasının “Aksentiy Doljnenko” lişeyi.

Mihail KAZANCI, Valkaneş kasabasının “Aksentiy Doljnenko” lişeyi.

Djahangir AHMEDOV, Komrat kasabasının “Gavriil Gaydarci” lişeyi.

Pötr KARAGÄUR, Valkaneş kasabasının “Luçafarul” lişeyi.

Sergey KISA, Valkaneş kasabasının “Luçafarul” lişeyi.

Anastasiya KOSTEVA, Valkaneş kasabasının “Luçafarul” lişeyi.

İon HİORA, Valkaneş kasabasının “Luçafarul” lişeyi.

Anaa ARABACI, Çadır kasabasının “Mihail Guboglu” lişeyi.

Kseniya JELEZOGLU, Çadır kasabasının “Mihail Guboglu” lişeyi.

Yana ARNAUT, Komrat kasabasının “Mihay Eminesku” lişeyi.

Beatrisa-Paula HAİVAZ, Komrat kasabasının “Mihay Eminesku” lişeyi.

Valeriya HOMENKO, Komrat kasabasının “Mihay Eminesku” lişeyi.

Aleksandra SARIÖGLU, Baş küüyü (Kirsovo) küüyün “Mihail Tuzlov” lişeyi.

Vladislava KODJEBAS, Kıpçak küüyün “Semön Baranovskiy” lişeyi.

Gagauziya Başkanın Gramotalarını kabledän üürüdecilär:

Kristina İvanovna KAMBUR, Komrat “Gavriil Gaydarci” lişeyin romın dilindä hem literaturasında üürediciykası (bilgi kalitesinin sonuçları – 78,94%);

Ekaterina Semönovna BILBA, Komrat “Gavriil Gaydarci” lişeyin angliya dilindä üürediciykası (bilgi kalitesinin sonuçları: gagauz grupasında – 50,00%, rus grupasında – 73,68%);

Aleksandra Petrovna PATRAŞKU, Komrat “Gavriil Gaydarci” lişeyin matematikada üürediciykası (bilgi kalitesinin sonuçları – 57,89%);

Evgeniya Vasilyevna MARİNOVA, Komrat “Gavriil Gaydarci” lişeyin ga-

gauz dilindä hem literaturasında üürediciykası (bilgi kalitesinin sonuçları: gagauz grupasında – 60,00%, rus grupasında – 50,00%);

Olga İlyiniçna MORDARİ, Komrat “Gavriil Gaydarci” lişeyin romınların hem dünnä istoriyasında üürediciykası (bilgi kalitesinin sonuçları – 65,38%);

Natalya Mihaylovna BARLADÄN, Komrat “Gavriil Gaydarci” lişeyin romın dilindä hem literaturasında üürediciykası (bilgi kalitesinin sonuçları – 61,53%);

İvanna Stepanovna UZUN, Kongaz “Todur Zanel” lişeyin romınların hem dünnä istoriyasında üürediciykası (bilgi kalitesinin sonuçları – 56,00%);

Elizaveta Vasilyevna BUZACI, Çadır “Valentin Moşkov” lişeyin geografiyada üürediciykası (bilgi kalitesinin sonuçları – 71,42%);

Olga Mihaylovna KİRİTA, Çadır “Valentin Moşkov” lişeyin angliya dilindä üürediciykası (bilgi kalitesinin sonuçları – 50,00%);

Evgeniya Vasilyevna STOYANOVA, Çadır “Mihail Guboglu” lişeyin romın dilindä hem literaturasında üürediciykası (bilgi kalitesinin sonuçları – 55,50%);

Alöna Vasilyevna KOL, Çadır “Mihail Guboglu” lişeyin romınların hem dünnä istoriyasında hem da geografiyada üürediciykası (bilgi kalitesinin sonuçları: gagauz grupasında – 50,00%, rus grupasında – 53,80%);

Natalya Mihaylovna PANÇEVA, Çadır “Mihail Guboglu” lişeyin romınların hem dünnä istoriyasında üürediciykası (bilgi kalitesinin sonuçları – 62,50%);

Tatyana İvanovna YANAK, Çadır “Mihail Guboglu” lişeyin romın dilindä hem literaturasında üürediciykası (bilgi kalitesinin sonuçları – 56,20%);

Svetlana Georiyevna BUYULKI, Kıpçak “Semön Baranovskiy” lişeyin gagauz dilindä hem literaturasında üürediciykası (bilgi kalitesinin sonuçları – 90,00%);

Mariya İlyiniçna KOCEBAŞ, Kıpçak “Semön Baranovskiy” lişeyin gagauz dilindä hem literaturasında üürediciykası (bilgi kalitesinin sonuçları – 76,00%);

Lidiya İvanovna ÜSÜMBEYLİ,



Kıpçak “Boris Yanakoglu” lişeyin gagauz dilindä hem literaturasında üürediciykası (bilgi kalitesinin sonuçları – 56,25%);

Elena Mihaylovna MOMAT, Kazayak lişeyin romın dilindä hem literaturasında üürediciykası (bilgi kalitesinin sonuçları – 52,00%);

Tatyana İvanovna KADINTEVA, Kazayak lişeyin angliya dilindä üürediciykası (bilgi kalitesinin sonuçları – 66,60%);

Olesä Georgiyevna KOL, Kazayak lişeyin himiyada üürediciykası (bilgi kalitesinin sonuçları – 100,00%);

Elena Nikolaevna KOL, Kazayak lişeyin gagauz dilindä hem literaturasında üürediciykası (bilgi kalitesinin sonuçları – 100,00%);

Marina Viktorovna RATKOGLU, Komrat “Dimitri Karaçoban” lişeyin romınların hem dünnä istoriyasında üürediciykası (bilgi kalitesinin sonuçları – 53,00%);

Yuliya Konstantinovna NİKOLOVA, Çadır “Mihail Çakir” lişeyin geografiyada üürediciykası (bilgi kalitesinin sonuçları – 87,50%);

Nataliya Dimitriyevna TÜRKAN, Komrat “Nikolay Tretyakov” lişeyin angliya dilindä üürediciykası (bilgi kalitesinin sonuçları: gagauz grupasında – 61,00%, rus grupasında – 72,30%);

Olesä Vladimirovna RAKOVÇEVA, Komrat “Nikolay Tretyakov” lişeyin himiyada üürediciykası (bilgi kalitesinin sonuçları – 50,00%);

Olga Georgiyevna NOVİKOVA, Komrat “Nikolay Tretyakov” lişeyin romınların hem dünnä istoriyasında üürediciykası (bilgi kalitesinin sonuçları – 55,00%);

Elena KARANFİL, Çadır “Orizont” lişeyin angliya dilindä üürediciykası (bilgi kalitesinin sonuçları – 83,33%);

Sergey TORGAN, Çadır “Orizont” lişeyin geografiyada üüredicisi (bilgi kalitesinin sonuçları – 54,54%);

Liliya TOPÇU, Çadır “Orizont” lişeyin matematikada üürediciykası (bilgi kalitesinin sonuçları – 50,50%);

Mariya Afanasiyevna KAPSO-MUN, Avdarma “Dimitriy Çelingir” lişeyin gagauz dilindä hem literaturasında üürediciykası (bilgi kalitesinin sonuçları – 56,00%);

Marianna Petrovna HARİTOVA, Ütülü “Saveliy Ekonomov” lişeyin himiyada hem biologiyada üürediciykası (bilgi kalitesinin sonuçları – iki predmettä dä 100,00%);

Anna İlyiniçna UZUN, Ütülü “Saveliy Ekonomov” lişeyin gagauz dilindä hem literaturasında üürediciykası (bilgi

kalitesinin sonuçları – 76,92%);

Tamara Dimitriyevna BEÜ, Kongaz “Süleyman Demirel” lişeyin romın dilindä hem literaturasında üürediciykası (bilgi kalitesinin sonuçları – 60,50%);

Sofya İlyiniçna PANAİTOVA, Kongaz “Süleyman Demirel” lişeyin romınların hem dünnä istoriyasında üürediciykası (bilgi kalitesinin sonuçları – 58,30%);

Canik SUZAN, Kongaz “Süleyman Demirel” lişeyin angliya dilindä üüredicisi (bilgi kalitesinin sonuçları – 72,22%);

Zinaida Födorovna ÇEBANOVA, Kongaz “Süleyman Demirel” lişeyin geografiyada üürediciykası (bilgi kalitesinin sonuçları – 84,00%);

Aurika KANÇUK, Valkaneş “Luçafarul” lişeyin angliya dilindä üürediciykası (bilgi kalitesinin sonuçları – 66,66%);

Tatyana KAZANCI, Valkaneş “Luçafarul” lişeyin romınların hem dünnä istoriyasında üürediciykası (bilgi kalitesinin sonuçları – 60,00%);

Viorika FİTA, Valkaneş “Luçafarul” lişeyin romın dilindä hem literaturasında üürediciykası (bilgi kalitesinin sonuçları – 50,00%);

Stepanida Stepanovna VARBAN, Komrat “Dimitriy Mavrodi” lişeyin gagauz dilindä hem literaturasında üürediciykası (bilgi kalitesinin sonuçları – 68,75%);

Anastasiya İvanovna BOYKOVA, Baş küüyü (Kirsovo) küüyün “Mihail Tuzlov” lişeyin bulgar dilindä hem literaturasında üürediciykası (bilgi kalitesinin sonuçları – 56,00%);

Elena Radionovna KURTOVA, Baş küüyü (Kirsovo) küüyün “Mihail Tuzlov” lişeyin angliya dilindä üürediciykası (bilgi kalitesinin sonuçları – 58,00%);

Anna Danilovna SUKMAN, Baş küüyü (Kirsovo) küüyün “Mihail Tuzlov” lişeyin gagauz dilindä hem literaturasında üürediciykası (bilgi kalitesinin sonuçları – 83,00%);

Larisa Viktorovna POSMAK, Valkaneş “Aksentiy Doljnenko” lişeyin angliya dilindä üürediciykası (bilgi kalitesinin sonuçları – 52,94%);

Födora Panteleyevna ONOFREY, Valkaneş “Aksentiy Doljnenko” lişeyin gagauz dilindä hem literaturasında üürediciykası (bilgi kalitesinin sonuçları – 70,00%);

Praskovya Andreevna SKUTARU, Komrat “Mihail Eminesku” lişeyin romın dilindä hem literaturasında üürediciykası (bilgi kalitesinin sonuçları – 50,00%).



“MFL CUP 2025” bitti – Kubok Kongaza gitti

Başlatıp Kirez ayın (iyün) 1-dän Orak ayın (iyül) 20-dän Komratta, Gagauziyanın baş stadionunda, geçti “MEDIA FOOTBALL LEAGUE CUP COMRAT” (“MFL CUP 2025”) futbol turniri. Onun finali hem ödüllemä sırası Orak ayın (iyül) 20-dä oldu. Bu turnirin ofițial partnörü olarak, “Ana Sözü” gazetasında “MFL CUP 2025” için annatmayı başaeriz.



“Komrat Kuboona Mediya Futbol Ligi – 2025” (“MFL CUP 2025”) finalında karşı geldilər FK “Constructorul” (Leova) – FK “Kongaz” (Kongaz) komandaları. Keskin hem meraklı bir matçta FK “Kongaz” komandası 1:0 ensedi. Ölecä “MFL CUP 2025” turnirin altın medalileri hem Kuboo Kongaza gitti! Gümüş medalilər FK “Constructorul”a verildi.

Hep o günü 3-cü er için oynadılar FK “Kara Beygir” (Komrat) – FK “Betacon Plus” (Komrat). Bu matçta 4:1 ensedi FK “Kara Beygir” komandası.

“MFL CUP 2025” turnirin ödüllemä sırasında, bu yarışmayı kuran insannar Gavriil TULBA hem Sergey MILKAN şükür ettlär hepsinä, kim pay aldı bu unudulmaz turnirda: futbolculara, sudyalara hem taraftarlara, “Mediya Fut-

bol Ligi – 2025” ortaklarına, dostlarına hem sponsorlarına.

“MFL CUP 2025” turnirini kuran hem hazırlayan Komrat kasabasının Muniıpiy Sport Şkolasının (MSS) direktoru Gavriil Borisoviç TULBA, danışarak turnirin hazırlamak komandasına, urguladı: “Başımı iilderim sizin işinizin, cuvapçılınızın hem turnir için yanmanızın önündä. Sizsiz bu yortu olamayaceydı – sudyalar komandası, mediya komandası, teknik komandası, hepsi komandaların temsilcileri! Hem, belliki, şimdi artık hepsicii bekleer eni futbol sezonunu hem “MFL CUP”un sıradaki turnirini. Büün biz Moldovada sportun eni sayfasını yazêrız! Birliktä – koca bir kuvediz!”

“Komrat Kuboona Mediya Futbol Ligi – 2025” (“MFL CUP 2025”) tur-



nirin en çok gol atan bombardırları da belli oldu; 7-şar gol attılar – Stanislav DOBRIOGLU (FK “Betacon Plus”) hem Dimitriy KALARAS (FK “Kara Beygir”), 6-şar gol attılar – Yuriy STANÇEV (FK “Betacon Plus”) hem Pavel PULUKÇU (FK “Kongaz”).

“Media Football League cup Comrat” (“MFL CUP 2025”) futbol turnirinde pay aldılar Gagauziyadan hem Moldovadan 12 komanda, angıları, çetileyä görä, 2 grupaya bölündüydüylär:

“A” grupası: FK “Betacon Plus” (Komrat), FK “CMF Kahul” (Kaul), FK “Kirsovo” (Başküüyü), FK “Oguzsport” (Komrat), FK “Tomay” (Tomay) hem FK “Vişiniovca” (Vişinövka).

“B” grupası: FK “Asker Komrat”

(Komrat), FK “Constructorul” (Leova), FK “Galactika” (Çadır), FK “Kara Beygir” (Komrat), FK “Kongaz” (Kongaz) hem FK “Maiak” (Başküüyü).

Aşaada bu futbol turnirin 5-ci turun, ¼ final; ½ final hem final oyunların esaplarını vereriz:

ТОП БОМБАРДИРОВ MFL CUP 2025			
СТАНИСЛАВ ДОБРИОГЛУ	ДИМИТРИЙ КАЛАРАШ	ЮРИЙ СТАНЧЕВ	ПАВЕЛ ПУЛУКЧУ
7	7	6	6
ГОЛОВ	ГОЛОВ	ГОЛОВ	ГОЛОВ
В В МАТЧАХ	В В МАТЧАХ	В В МАТЧАХ	В В МАТЧАХ



5-ci tur

FK “Maiak” – FK “Kongaz” – 1:4;
FK “Galactika” – FK “Asker Komrat” – 0:0
(penaltilerdän 4:5 – ensedi FK “Asker Komrat”);
FK “CMF Kahul” – FK “Kirsovo” – 2:0;
FK “Tomay” – FK “Vişiniovca” – 0:2;
FK “Oguzsport” – FK “Betacon Plus” – 2:3;
FK “Constructorul” – FK “Kara Beygir” – 1:0.

¼ final

FK “Betacon Plus” – FK “Asker Komrat” – 3:0;
FK “Constructorul” – FK “CMF Kahul” – 0:0
(penaltilerdän 4:3 – ensedi FK “Constructorul”);
FK “Oguzsport” – FK “Kara Beygir” – 0:2;
FK “Kirsovo” – FK “Kongaz” – 1:2.

½ final

FK “Betacon Plus” – FK “Kongaz” – 2:2

(penaltilerdän 3:4 – ensedi FK “Kongaz”);

FK “Constructorul” – FK “Kara Beygir” – 2:2
(penaltilerdän 4:2 – ensedi FK “Constructorul”).

final

1-ci er için: “Constructorul” – FK “Kongaz” – 0:1.

3-cü er için: FK “Kara Beygir” – FK “Betacon Plus” – 4:1.

“ANA SÖZÜ” Gagauz dilindä gazeta
Çıkêr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

Gazeta “Universul” basım evindä basilêr
Tiraj – 3020 ekz. Sımarlamak No: 881

İndeksi - PM – 21358

YAZIŞMA ADRESİMİZ:
RM – 2028, Moldova, Kişinêu,
c/p Nr. 1025. Tel/fax: 022 28-18-04

e-mail: todur.zanet@gmail.com
zanet@anasozu.com